

IKA-9 NA ARALIN

ANG PAGKAKARON NG ISANG MALIGAYANG TAHANAN



Sa Araling Ito'y Pag-aaralan Mo
Dumalangin At Gumawa Para Sa Kaligtasan
Ng Iyong Pamilya
Maging Mabuting Cristiano Sa Tahanan
Ihingi Ng Tawad Ang Iyong Pagkakamali
Maging Masayahin
Panatilihing Banal Ang Pag-aasawa
Mag-asawa Sa Isang Cristiano
Maging Ulirang Magulang
Ituro Sa Mga Anak Ang Pag-ibig Sa Diyos
Ibigin Ang Iyong Pamilya

Ang Gagawin Mo

4. Basahin ang Colosas 3 at tingnan kung masusunod mo ang mga turong ito sa inyong tahanan.

Pinahahalagahan mo ba ang ginagawa ng iyong asawa? Ang tulong ng iyong mga anak o kapatid? ang pagpapakasakit ng iyong mga magulang para sa iyo?

Mapagmahal ka ba o makasarili? Magagalitin ka ba o mapagpatawad? Mapaghari-harian ka ba, o pinakikinggan mo ang iba? Magalang ka ba't masunurin sa magulang, o masuwayin?

Matulungin ka ba't mapagbigay? o tamad? Nakikipagtulungan ka ba sa iba nang di namimintas at dumaraing? Madali ka bang panghinaan ng loob, o masayahin ka kahit nagkaka-gulo-gulo ang mga pangyayari? Madali ka bang pakisamahan?

Ang Gagawin Mo

5. Kung nais mong magkaroon ng maligayang tahanan, mataos mong tanggapin ang iyong pagkukulang at patulong sa Panginoon upang mapagtagumpayan ito. Kung handa mong gawin ang iyong bahagi, tutulungan ka ng Panginoon.

Ihingi Ng Tawad Ang Iyong Pagkakamali

Tinuruan tayo ni Jesus na humingi ng tawad sa mga taong ating pinagkasalahan. Kung hindi natin ito gagawin, puputulin nito ang pakikipagkaisa natin sa Diyos.

Kaya't kung naghahandog ka sa Diyos, at maalaala mo na may sama ng loob sa iyo ang kapatid mo, iwan mo muna ang iyong handog sa harap ng dambana at makipagkasundo ka sa iyong kapatid. Saka ka magbalik at maghandog sa Diyos. Mateo 5:23, 24.



Hindi madaling sabihin na “Ikinalulungkot ko ng naging masakit ang aking pananalita. Patawarin mo ako,” nguni’t ito’y mabisang makapag-aalis ng sama ng loob at mapananatiling maligaya ang iyong tahanan. Mainitin ba ang iyong ulo? Kilalanin mo ang iyong pagkukulang at hilingin sa iyong mahal sa buhay na idalangin kang mapagtagumpayan ito.

Kaya nga, ipagtapat ninyo sa iyong kapwa ang inyong mga kasalanan at ipanalangin ang isa’t isa, upang kayo’y gumaling. Santiago 5:16

Ang Gagawin Mo

6. Higit na magiging maligaya ang inyong tahanan kung
- _____ a) hihingi ka ng tawad kung nagkulang ka sa iyong kasambahay.
 - _____ b) ang lahat ay pahihingin mo ng tawad.
 - _____ k) ipakikita mo sa lahat na ikaw ang panginoon at dapat kang pangilagan.
7. Isaulo ang Santiago 5:16.

Sagot: 6. a) hihingi ka ng tawad kung nagkulang ka sa iyong kasambahay.

Maging Masayahin

Manalig ka sa Diyos at papurihan Siya sa pagtugon Niya sa iyong dalangin bagama't palagay mo'y walang kapayapaan.

Ang kagalakan sa Panginoon ay inyong kalakasan. Nehemias 8:10

Huwag malungkot kung nahihirapan kang sumupil sa kainitan ng ulo mo o anumang di mabuting ugali. Ang pagsisikap mo'y patunay ng iyong pagibig sa Panginoon. Tutulungan ka Niyang lumago sa buhay espirituwal. Naiinip ka

ba sa paglago mo? Sa Panginoon ka umasa at huwag sa sarili, at magugulat ka sa paglutas Niya ng suliranin ng iyong tahanan. Ang Diyos ay magiliwing Ama at ipinagmamalasakit ka Niya.

Ang Gagawin Mo

8. Sauluhin ang Nehemias 8:10.

Panatilihing Banal Ang Pag-aasawa

May mga bayang ang mag-asawa'y nagsasama nang hindi nakakasal. Kapag naging Cristiano ang isang tao, ibig niyang maging legal and kanyang pag-aasawa. Sa ganito'y higit na mabuti ang patotoo niya, sinusunod niya ang kautusan ng bayan alang-alang sa kanyang pamilya, at pinarangalan niya si Cristo. Kung kailangan mo ang payo tungkol sa mahahalagang kasulatang legal sumangguni ka sa iyong pastor. Tutulungan ka niya sa abot ng kanyang kaya.

Ang Salita ng Diyos ay labang-laban sa anumang uri ng kaugnayang pangmag-asawa sa mga hindi kasal. Mahigpit Niyang sinasalungat ang anumang paglalaro ng apoy o pagkahumaling sa iba ng sinuman sa mag-asawa.

Ang isa sa malaking pagpapala ng tahananang Cristiano ay ang pagtitiwala ng mag-asawa sa isa't isa kung alam nilang kapwa sila tapat sa pag-iisip, salita, at gawa. Sa kanilang paglilingkod sa Panginoon, ang tahana'y nagiging "munting langit", walang pandaraya, paninibugho, at kaktasilang sumisira sa maraming tahanan.

Dapat igalang ng lahat ang pag-aasawa. Hebreo 13:4. Huwag kayong gumanti ng masama sa masama. Mamuhay kayo nang maayos sa gitna ng mga walang pananampalataya. Kahit na pinararatangan nila kayo ng masama, magpupuri sila sa Diyos sa araw ng Kanyang pagdating, kapag nakita nila ang inyong mabuting gawa. Roma 12:17. I Pedro 2:12

Ang Gagawin Mo

9. Upang magkaroon ng magandang patotoo at malasap ang pagpapala ng Diyos sa inyong tahanan, dapat kang
- _____ a) pakasal ng legal bago kayo magsamang mag-asawa.
 - _____ b) makisama sa iyong kasintahan bago kayo pakasal upang matiyak mong magkatugma kayo.
 - _____ k) manatiling walang asawa.

10. Hinging pagpalain ng Diyos ang inyong tahanan, upang patibayin ng Kanyang pag-ibig ang inyong pag-iibigan. Idalanging kayo'y magtapat sa isip, salita, at gawa. Patulong sa Diyos upang makapagtiwala kayo sa isa't isa.

Sagot: 9. a) pakasal ng legal bago kayo magsamang mag-asawa.

Mag-asawa Sa Isang Cristiano

Di kasi, kung kasal ka na sa isang di-Cristiano, tungkulin mong siya'y idalangin at sikaping mahikayat kay Cristo. Maging matapat kang asawa at paliwanagin mo ang iyong ilaw sa inyong tahanan. Nguni't kung wala ka pang asawa at nagbabalak pa lamang, tiyaking ang kukunin mo'y Cristiano. Ito lamang ang tanging paraan upang magkaroon ng tunay na pagkakaisa at kapayapaan sa iyong buhay pampamilya.

Kung mag-aasawa ka sa di kapanalig, hindi mawawala ang mga suliranin. Paano kayo magkakasundo sa pagmumulat sa inyong mga anak tungkol sa relihiyon? Paano ninyo sila tuturuang makapag-lingkod sa Panginoon?

Tinanggap mo na si Cristo na Panginoon ng iyong buhay. Kung ayaw ng iyong asawang paglingkuran Siya, magkakasalungatan kayo sa

bagay na ito. Lagi kayong hindi magkakasundo sa dalawang ito: ang makapag-bigay lugod kay Cristo sa lahat ng bagay at ang pagnanais na mabigyang-kasiyahan ang iyong kabiyak.

Bilang isang Cristiano, ibig mong makalugod sa Diyos. Ibig mong makapaglingkod sa Kanya, makadalo at makibahagi sa gawain sa iglesya, at makigalak sa mga kapatid na Cristiano. Ibig mong magkaroon ng panalanging pampamilya, upang inyong purihih, sambahin, at paglingkurang magkasama ang Diyos.

Walang hilig sa ganitong mga bagay ang asawang di-ligtas. Nakababagot sa kanya ang gawain sa iglesya. Kung sumasama man siya sa iyo, aasahan niyang pagbibigyan mo siya't sasama ka sa kanyang sa mga pag-aaliw na hindi dapat sa isang Cristiano. Kung hindi, kanyakanya kayo ng landas, at diyan nagsisimula ang malungkot na tahanan. Ang masama pa nito'y, marami ng Cristiano ang nailayo ng asawang di-ligtas sa Panginoon.

Ibig ng Diyos na maging maligaya ang iyong tahanan. Ayaw Niyang masilo ka ni Satanas gaya ng maraming Cristiano. Tahasang nagbababala ang Diyos na huwag kang mag-asawa sa di-mananampalataya.

Huwag kayong makisama sa mga di-suma-sampalataya. Maaari bang magsama ang katuwiran at ang kalikuan? O kaya'y ang liwanag at ang kadiliman? 2 Corinto 6:14,

Ang Gagawin Mo

11. Ang pag-aasawa ng Cristiano sa di-mananampalataya ay

_____ a) mabuting paraan upang mahikayat siya sa Panginoon.

_____ b) mabuti, kung nagmamahal sila.

_____ k) pagsuway sa utos ng Panginoon.

Sagot: 11. k) pagsuway sa utos ng Panginoon.

Maging Ulirang Magulang

Pananagutan ng mga magulang ang pag-aaruga sa kanilang mga anak. Ang ama, na pangulo ng tahanan, ay dapat tumustos sa pangangailangang materyal at espirituwal ng kanyang pamilya. Ang ina rin ay dapat maging magiliw at mapagmahal sa mga anak. Ang mga gawain sa iglesya'y hindi dapat maging hadlang sa katungkulan ng mga magulang sa kanilang pamilya.

Ang sinumang hindi kumakalinga sa kanyang mga kamag-anak, lalo na sa mga kasambahay, ay tumatalikod sa pananampalataya at masahol pa sa mga walang pananampalataya. **I Timoteo 5:8.**

Ang Gagawin Mo

12. Ang amang nagpapabaya sa kanyang pamilya upang makapangaral ay

_____ a) may marubdob na pagtalaga ng kanyang buhay sa Diyos.

_____ b) nagkukulang sa pananagutang kaloob ng Diyos upang kalingain ang kanyang pamilya

Sagot: 12. b) nagkukulang sa pananagutang kaloob ng Diyos upang kalingain ang kanyang pamilya.

Ituro Sa Mga Anak Ang Pag-ibig Sa Diyos

Kung tuturuan mo ang mga anak na umibig sa Diyos at sumunod sa Kanyang Salita sa kanilang kabataan hindi ka magkakaroon ng maraming sakit ng loob kung sila'y tumanda. Tipunin mo ang iyong pamilya upang kayo'y magbasa ng Biblia at manalangin sa bawa't araw. Bigyan ng bahagi ang bawa't isa. Idalangin ninyo ang mga suliranin. Pasalamatang mga pagpapala ng Diyos.

Dumalo kayong magkasama sa Paaralang Lingguhan at pananambahan. Hikayatin ang mga bata na ibigay ang kanilang buhay sa Panginoon habang sila'y mga bata pa.

Sa paglilingkod ninyong magkasama, patibayin ng pag-ibig ng Diyos ang taling nag-uugnay sa inyong pamilya. Gaya ng sawikain: "Ang pamilyang nananalanging magkakasama'y nananatiling magkakasama."

Mga magulang, huwag ninyong ibuyo ang inyong anak sa paghihimagsik laban sa inyo dahil sa inyong malabis na kahigpitan; sa halip ay palakihin sila sa tuntunin at aral ng Panginoon. Efeso 6: 4

Ang Gagawin Mo

13. Punan ang puwang sa sawikaing ito:
 “Ang pamilyang _____ magkakasama ay _____ magkakasama.”
14. Kung ikaw ay magulang, idalangin mo ngayon ang bawa't anak mo. Patulong sa Panginoon upang sila'y matulungan mo. Humingi ng higit na tiyaga at pang-unawa.

Sagot: 13. nananalanging, nananatiling

Ibigin Mo Ang Iyong Pamilya

“Ang Diyos ay Pag-ibig.” Kung higit ang pananatili ng Diyos sa iyong buhay, mararagdagan ang iyong pag-ibig sa pamilya. At sapagka't iniibig mo sila, lalong liligaya ang inyong tahanan.

Ang Gagawin Mo

15. Idalangin sa Panginoon na tulungan ang inyong pamilya na lalong mag-ibigan.
16. Basahin mo ang I Corinto 13 at patulong ka sa Diyos upang maisagawa ito sa tahanan.